

EDITORIAL

Kalihukang masa ang tubag sa krisis ug kalamidad

Bag-ohay lang nga gi-gun-ob sa pagbaha ug pagdahili yuta ang National Capital Region ug daghang bahin sa Luzon, hangtud sa Visayas ug Mindanao, tungod sa ulan nga dala sa bagyo ug habagat. Midagayday ang tubig nga naggikan sa mga upaw nga bukid nga nagresulta sa mga pagdahili sa yuta, pag-awas sa mga mabaw nga sapa nga puno sa lapok, ug pagbaha sa lapad nga kaumahan sa kapatagan. Mitaas ang tubig sa kasyudaran tungod sa nagkayamukat nga imprastruktura ug reklamasyon nga mibara sa mga agianan sa tubig, ug tungod sa palpak nga sistema sa pagkontrol sa baha.



Mikabat 50 ang namatay ug minilyon ang nag-antus. Gatasan ka milyong piso ang balor sa nadaut nga mga balay ug kabtangan, imprastruktura, mga pananum ug panginabuhian sa masa. Subling nakita ang bulnerabilidad sa kalamidad sa minilyong masang kabus sa mga payag nga walay igong panagang sa hangin ug ulang dala sa mga bagyo.

Gibutyag sa malukpanong pagbaha nga haw-ang ug puro bakak ang gipanghinambog ni Marcos sa iyang State of Nation Address. Duha ka adlaw sa wala pa ang mga pagbaha, iyang giingon nga "andam na kaayo" ang iyang gubyerno sa bisan unsang bagyong moabot. Napamatud-an nga walay pulos ang

gipanghambog nga 5,500 nga proyekto alang sa pagkontrol sa baha nga gigastusan sa iyang gubyerno og kapin sa ₱255 bilyon niadtong miaging tuig.

Sa milabayng mga tuig, nagkadaghan ug nagkagrabe ang kadaut sa kinabuhi ug panginabuhian sa katawhan tungod sa mga kalamidad. Resulta kini dili lamang sa mga pagbag-o sa klima nga nagdala og grabeng init o ulan, apan ilabi na sa grabeng kapalpakan ug pagpasagad sa reaksyunaryong estado. Labaw pang dakung kadaut sa kinabuhi ug panginabuhian sa masa ang gibunga sa padayong paghatag dalan sa rehimen ni Marcos sa walay hunong nga pagbungkag sa mga kalasangan

ug pagpangawkaw sa kinaiyahan.

Diha-diha nga milihok ang mga pwersa sa Partido ug nasudnon-demokratikong kalihukan aron motabang sa masa atol sa kalamidad. Daghan kanila ang usab mga biktima usab sa pagbaha ug pagkaguba sa mga balay ug kabtangan. Ang ilang paspas nga pagresponde sa kalamidad nagpakita sa ilang pakigtambayayong sa masang naapektuhan, kaandamong molihok aron mapagaan ang kasakit nga giatubang sa masa, ug sa matngong pagpalihok ug pagtigum sa kusog sa masa.

Sa mga lugar nga naapektuhan, gipalihok ang tibuok makinarya sa Partido aron mangolekta ug tubig,

pagkaon, sinina ug uban pang hinaling panginahanglanon, ug makigtambayayong sa lain-laing ahensya ug mga organisasyon aron mahatod dayon kini sa mga apektado. Kadungangan niini, gipataas ang pagsabot sa masa sa mga hinungdan sa kalamidad ug panginahanglan sa pagtinabangay aron hiniusang makabarro gikan sa kadaut ug magpanalipud sa ilang mga katungod.

Ang pagpakusog sa kalihukang masa ug pagpangulo d sa Partido ang yawe sa epektibong pag-atubang sa masa sa mga kalamidad. Sa pikas bahin, sa pag-atubang sa mga kalamidad, labaw pang mapakusog ang kalihukang masa ug mapalambo ang inisyatiba ug diwa sa hiniusang paglihok, pagtinabangay ug pagtambayayong sa masa. Asaman nagantus ang masa, angay lamang nga anaa ang presensya sa Partido, mga rebolusyonaryo ug demokratikong organisasyong masa aron ipataas ang ilang kahimatngon ug kapasidad nga motubag sa mga kalamidad.

Angayang ipasabot nga sa pagatubang sa kalamidad, kinahanglan ang pagtinabangay ug pagkig-unong, apan dili kini igo. Angayan usab nga ipataas ang katilingbanon ug pulitikanhong kahimatngon sa

masa nga ang ilang pag-antus sa kalamidad dili yanong hinungdan sa dautang panahon o "silot sa Diyos" apan binuhatan sa mga langyawng kapitalista ug lokal nga hut-ong nga hakog sa bahandi nga nangawkaw sa kinaiyahan ug sa pondo sa katawhan.

Kinahanglang ipunting ang ilang atensyon sa pagsingil sa rehimeng US-Marcos ug tibuok reaksyunaryong estado sa mga palisiya ug kapalpak niini nga nagpagrabe sa epekto sa mga kalamidad ngadto sa masa. Kinahanglang batukan ang programa sa reaksyunaryong gubyrno nga naghatag-prayoridad sa mina, pagpalapad sa mga plantasyon, kumbersyon sa yuta para sa mga proyektong real estate, walagtoo nga reklamasyon sa yuta, pagtukod sa mga megadam, ug uban pa.

Mas grabe pa, ginapahimuslan sa mga burukrata ang mga kalamidad aron makakwarta ug makapangurakot. Kinahanglang ibutyag ang kamatuoran nga walay malungtaron o pangkinatibuk-ang plano sa pagkontrol sa baha, ug batikuson ang gatusan ka bilyong pondo nga gihahin sa gubyrno sa mga proyektong "flood control" nga gikurakot lamang sa mga burukratang kapitalis-



ta ug kroni sa negosyo.

Kinahanglang molihok ang masa aron singilon ang reaksyunaryong gubyrno sa kadaut sa ilang kinabuhi, panginabuhian ug mga kabtangan tungod sa kapakyas niini sa katungdanan niining masiguro ang kaluwasan ug kaayohan sa katawhang Pilipino. Labaw pa sa ayuda, katilingbanong hustisya ang singgit sa katawhan.

Sa mga natarang gerilya, kinahanglang tukuron o pakusgon ang mga organo sa pulitikanhong gahum, kauban ang Bagong Hukbong Bayan, sa pagpatuman sa mga palisiya sa pagpanalipud sa kinaiyahan, pagdili sa magun-ubong mga proyekto ug pagsilot sa mga operasyong nanggun-ob sa mga bukid, lasang ug sapa, ug nangawkaw sa yuta sa masang mag-uuma ug minorayang katawhan. Angayang palihukon ang masa para sa pagpangandam sa mga umalabot pang kalamidad.

Ang bag-ohay nga kalamidad siguradong dili mao ang katapusan nga mohampak sa masa sa katawhang Pilipino. Sa banabana sa mga eksperto, magsugod ang penomenong La Niña taliwala sa tunga-tunga Agosto ug Oktubre, nga gilau-mang magdala og grabeng pag-ulan. Labaw king magdala og kasakit sa masang Pilipino ilabina atubangan sa nagkagrabeng krisis, pagsaka sa presyo sa bugas, karne, utan ug uban pang pagkaon ug batakang mga panginahanglan, ug ubos kaayong suhulan ug kita sa katawhan.

Dakung hagit ug higayon ang ginaatubang nga krisis ug kalamidad aron pangulohan ug pakusgon sa Partido ang tibuok rebolusyonaryong kalihukan isip armas sa katawhan sa pagpanalipud sa ilang kaayuhan. Kinahanglang tibuok-kusog nga ihatag sa tanang kadre ug myembro sa Partido ang ilang kalantip ug kusog aron mogamot ug magpalapad sa han-ay sa masa, aron pukawon, organisahon ug palihukon ang katawhan isip labawng gamhanang pwersa nga motapos sa tanang delubyong dala sa madaugdaugon ug mapahimuslanong sistema. AB

 <p>Bolyum LV Ihap 15 Agosto 7, 2024</p> <p>Ang Ang Bayan ginapagawas sa pinulongang Pilipino, Bisaya, Iloco, Hiligaynon, Waray ug Ingles. Nagadawat ang Ang Bayan og mga kontribusyon sa porma sa mga artikulo ug balita. Ginaawhag usab ang mga tigbasa nga magpadangat og mga puna ug rekomendasyon sa pagpalambo sa atong mantalaan.</p>	<h2 style="text-decoration: underline;">Unod</h2> <p>Editorial: Kalihukang masa ang tubag sa krisis ug kalamidad 1</p> <p>SONA ni Marcos, layo sa kamatuoran 3</p> <p>SBDP, dagway sa korapsyon ug pasismo 4</p> <p><i>Oil spill</i> sa Manila Bay 5</p> <p>Pagtuon sa IKP ug AKP, gilunsad sa ST 5</p> <p>Mga protesta 5</p> <p><i>Jeepney phaseout</i>, padayong gisuklan 6</p> <p>Pasistang lider sa Bangladesh, napalagpot 6</p> <p>Mga mamumuo sa Nexperia, magwelga 6</p> <p>Eleksyon sa Venezuela, gihilabtan sa US 6</p> <p>Interbensyon sa US sa Asia, "hypermode" 7</p> <p>4 ka tawo, gipatay sa AFP 8</p> <p>"Libreng wifi" sa Rizal, alang sa sarbeylans 8</p> <p>Sa mubong pagkasulti 9</p> <p>Perwisyo ang dala sa mga dam sa Kalinga 10</p>
<p>Ang Ang Bayan ginamantala duha ka hugna matag bulan sa Komite Sentral sa Partido Komunista ng Pilipinas</p>	
 ang.bayan@cpp.ph	

Layo sa kamatuoran ang ikatulong SONA ni Marcos Jr

Layo kaayo sa kamatuoran ug sa adlaw-adlaw nga pag-antus sa katawhang Pilipino ang gipahayag ni Ferdinand Marcos Jr sa iyang ikatulong State of the Nation Address (SONA) niadtong Hulyo 22. Gigamit lamang niya ang SONA aron tabunan ang krisis sa ekonomiya ug balik-balikon ang iyang mga daw engrandeng "kadaugan" ug gipanghambog nga "Bagong Pilipinas."

Naghimo si Marcos ug usa ka pekeng hulagway. Gituyo niyang imenos ang tataw nga mga problema sama sa pagsaka sa presyo sa pagkaon, serbisyo ug yutilidad, kulang nga sweldo, grabeng kawad-on sa trabaho ug kontraktwalisasyon, pagpangilog sa yuta ug panginabuhian, ug nagkadanghang biktima sa pulitikanhong pagpamatay ug pagpanumpo.

Ang nalipay lamang sa pagpapulong ni Marcos mao ang dagkung negosyo, langyawng kapitalista, ug mga burukrata-kapitalista. Silang tanan nakapahimulos sa iyang korapsyon, todong liberalisasyon sa pag-import, mga proyektong imprastruktura nga gipondohan sa langyaw ug adunay garantiya sa gubyerno nga hugot nga ginaspak sa katawhan, ug palisiya sa baratong pamuo, ug kumbersyon sa libuang ektaryang yuta aron makadani sa langyawng pamuhunan.

SONA sa katawhan

Ang tinuod nga kahimtang sa nasud klarong nadungog sa mga kadalanan gawas sa Kongreso, ingonman sa mga prubinsya, ug sa singgit sa mga migranteng mamumuo sa laing nasud. Sa pagpanguna sa Bagong Alyansang Makabayan (Bayan), libuang Pilipino ang nagprotesta sa adlaw sa ikatulong SONA.

Bisan ulan, nagmartsa sa Commonwealth Avenue sa Quezon City ang mga mag-uuma, mamumuo, kabatan-onan, kababayan-an, mga dray-

ber ug opereytor sa dyip, nasudnong minorya, mga kabus sa kasyudaran, magtutudlo, mga mamumuo sa pangkalawas, empleyado sa gubyrerno ug uban pang mga demokrati-kong sektor.

Gibatikos sa Bayan ang paggasto sa rehimeng Marcos og ₱20 milyon alang sa preparasyon, pagkaon ug uban pang gasto para sa SONA. Gikundena usab nila ang pagdeploy ni Marcos og 23,000 ka pulis sa Metro Manila aron pugngan ang mga lihoc-protesta. Gibabagan ang bulto sa mga nasudnon-demokrati-kong grupo nga magmartsa padulong sa Batasan Pambansa sa may Diliman Doctors Hospital.

Misalmot sa protesta ang kapin sa 600 gikan sa Southern Tagalog. Sa wala pa ang SONA, nagpahigayon sila og karaban sa pagpanguna sa rehiyonal nga balangay sa Bayan. Sunud-sunod nga protesta ang gilunsad sa delegasyon sa rehiyon sa lain-laing ahensya sa Metro Manila, lakip ang rali sa embahada sa US.

Samtang, gipadayon sa mga

representante sa Makabayan Bloc ang pagsul-ob og mga "protest outfit" o bisti nga adunay mga panawagan ug imahe sa mga sektor nga ilang ginarepresentahan. Mibarog silang suoton kini bisan pa sa naunang pagdili sa Kongreso ug pahimangno nga dili sila pasudlon.

Gilunsad usab ang susamang mga protesta ug martsa sa Baguio City niadtong Hulyo 21, ug sa Albay, Naga City, Cebu City, Bacolod City, Iloilo City, Roxas City sa Capiiz, Aklan, ug Davao City niadtong Hulyo 22. Nalunsad ang mga aktibidad taliwala sa militarisasyon sa mga barangay sa kabanikanhan ug mga pangharang ug tsekpoynt sa mga pulis sa syudad.

Nagpahigayon usab ang kapin sa 200 ka bilanggong pulitikal og usa ka adlaw nga pagpusa isip protesta sa rehimeng Marcos ug aron ibutyag ang ilang kahimtang sulod sa mapiot nga mga prisohan. Kapin sa 100 ang nag-ayuno sa isla sa Negros samtang nakighiusa usab ang mga taga-Palawan, Camarines Sur ug Metro Manila.

Liboan ka milya man ang gilayon gikan sa nasud, nagprotesta ang mga grupo sa migranteng Pilipino sa North America, Europe, Asia ug Australia sa pagpanguna sa mga balangay sa Bayan ug Migrante niadtong Hulyo 21 hangtud Hulyo 24.

Adunay mga aktibidad sa lima ka syudad sa Canada, sa pito ka erya sa US kung asa 1,100 ka Pilipino ang misalmot, sa Austria, Germany, Italy, Switzerland, ug United Kingdom. Aduna usay protesta sa tulo ka lugar sa Australia samtang usa ka aktibidad ang gilunsad sa New Zealand. Sa Asia, adunay mga aktibidad ang mga migranteng Pilipino sa Hong Kong, Japan, South Korea ug Taiwan. **AB**



Korapsyon ug pasismo ang dagway sa SBDP sa NTF-Elcac sa Northern Samar

Panahon na usab sa pagdungog sa nasudnong badyet sa Kongreso. Sama sa gidahum, binilyong piso na usab ang gipangayo sa National Task Force (NTF)-Elcac para sa programa niini nga Support to the Barangay Development Program (SBDP). Sa gisumiteng National Expenditure Program niadtong Hulyo 28, naggahin si Ferdinand Marcos Jr og ₱7.8 bilyon para sa pasistang ahensya. Niadtong miaging tuig, nakadawat kini og ₱2.16 bilyon para sa 864 nga “cleared” nga mga barangay. Sukwahi sa saad nga pagauswagon ang kinabuhi sa mga mag-uuma (aron kuno dili na mosuporta sa armadong pakigbisog), nagpabiling naglisud ang masa ug labaw pang gidaugdaug tungod kay gigamit sa pasistang militar ang SBDP isip pantabon sa labaw pang pagpaantus sa katawhan.

Pag-antus sa Barangay Hitapi-an

Usa sa mga barangay nga lakip sa SBDP sa NTF-Elcac ang Hitapi-an sa Catubig, Northern Samar, nga nakadawat og ₱20-milyong pondo niadtong 2021. Duha pa ka barangay sa Catubig (Osang, Nagoocan) ang nalakip sa SBDP sa NTF-Elcac niadtong tuiga.

Daghan ang gipangsaad nga mga kalsada (*farm-to-market road* o FMR), klasrum, programa alang sa panginabuhian ug ayudang pangpinansya sa mga residente bugti sa ilang “pagbawi sa suporta” sa Bagong Hukbong Bayan. Lakip niini ang proyektong “pastry” (paghimo og pan), ug pag-alima sa kanding ug pato. Apan human sa tulo ka tuig, nalpalpak ang tanan. Sa Osang, natanggong lamang ang gitambak nga mga makina sa pagtahi tungod kay walay magpatahi.

Gibasol sa 20th IB ug NTF-Elcac ang mga kapalpa-kan niini sa “kawalay pagbansay” sa mga residente ug kakulang sa paunang pagtuon nga kuno angay unta giandam sa lokal nga gubyerno. Tubag sa lokal nga mga upisyal, wala sila gikonsulta sa pagplano ug unang pagpatuman sa maong mga proyekto.

Miabot og halos upat ka tuig sa ayha nahuman sa NTF-Elcac ang pagsimento sa 400-metrong kalsada sa Hitapi-an.

Sa kakulang sa maayong plano, gihi-mo kini sa mga sundalo sa tunga-tunga sa humayan nga miguba sa mga umahan. Nagkantidad ang proyekto og mitaginting nga ₱14 milyon, o ₱35,000 kada metro sa kalsada. Layo nga mas mahal kini bisan sa susamang mga FMR sa ahensya sa ubang rehiyon, indikasyon sa dakung anomalya. Ang grabe, miabot lamang ang kalsada sa tumoy sa kasikbit nga barangay ug layo kaayo sa “merkado” o sentro sa komersyo. Gihulagway pa gihapon kini isip “lapok, layo ug anaa sa tunga sa humayan” ang byahe gikan sa sentro sa Catubig hangtud Hitapi-an. Sunod nga plano nga buhaton sa AFP maon ang pagtukod sa evacuation center, giingon nga pina-kadaku kini sa lungsod, bisan dili kini prayoridad sa barangay.

Gipailalum ang Hitapi-an ug ang klaster sa mga barangay nga target

sa SBDP sa Retooled Community Support Program (RCSP) sa 20th IB. Nahimong rekisito sa mga residente nga “mosurender” sa wala pa makadawat og mga benepisyo. Gipailalum ang baryo sa hugot nga paghari sa militar. Gikan Enero 2021 hangtud Hunyo 2024, nakarekord ang Ang Bayan og dili moubos sa 26 ka kaso sa seryosong mga paglapas sa tawhanong katungod sa tibuok Catubig. Lakip niini ang ekstrahudisyal nga pagpamatay, pagdagit, paturagas nga pagpamusil ug intimidasyon. Partikular sa Hitapi-an ug Osang, narekord sa AB ang pagbungkag sa kabtangan, iligal nga pagpangrekisa ug pagpangilog, ug pagpanghulga sa mga sibilyan.

Niadtong 2023, gitambak sa maong klaster ang pipila ka yunit sa 74th IB aron “tabangan” ang 20th IB nga “inutil” sa pagbungkag sa giingong pipila na lamang ka Pulang manggugubat ang nahibilin sa Northern Samar. Nagkabikil pa ang duha ka batalyon sa pag-unhanay nga moangkon sa mga “napa-clear” nga sibilyan aron makakubra og reward ug pondo sa programang Enhanced Comprehensive Local Integration Program.

Taliwala sa duha ka yunit-militar, balik-balik nga gipahamtang sa maong mga barangay ang hugot nga *lockdown* gikan sa miaging tuig. Nataranta ug nabalaka ang mga sundalo sa paghunahuna nga

gipalibutan sila sa mga tawo nga padayong nagasuporta sa rebolusyonaryong kalihukan, ug nahadlok nga bisan un-sang orasa mahimong atakehon sila sa BHB. Hugot nilang ginabantayan ang matag lihok sa mga residente ug ginalimitahan bisan ang ilang oras sa trabaho. Hugot usab ang pagbantay sa

Sundi sa panid 5



Marcos-San Miguel, gipapanubag sa *oil spill* sa Manila Bay

GIPAPANUBAG SA MGA grupo nga maki-kinaiyahan ang San Miguel Corporation ug ang rehimen ni Marcos sa nahitabong *oil spill* (miawas nga lana) gikan sa naunlod nga barkong MT Terra Nova sa Manila Bay. Matud nila, angay manubag sila sa kaudat nga dala sa miawas nga lana sa panginabuhi sa komunidad, sistema sa ekolohiya ug kahimsog sa katawhan.

Ang MT Terra Nova mao ang barkong gikontrata sa Petron Corporation, kumpanyang gipanag-iyahan sa San Miguel Corporation, aron maghatod ug 1.4 milyong litro nga pang-industriyang lana sa isla sa Panay. Gitugutan kini nga mobyahe sa Philippine Coast Guard taliwala sa dautang panahon. Miunlod kini pipila ka kilometro gikan sa baybayon sa Limay, Bataan niadtong Hulyo 25 ug nagsugod ang pag-awas sa lana duha ka adlaw human niini.

Ikaduhang dakung *oil spill* na kini ilalum sa rehimen ni Marcos. Niadtong miaging tuig, miunlod duul sa Lubang, Oriental Mindoro ang MT Princess Empress ug nayabo ang karga niining 800,000 litrong lana nga gikontrata nga ipadeliber sa Petron. Hangtud karon, giantus pa sa halos 25,000 ka mangingisda ang kaudat nga gidala niini sa mga baybayon sa Oriental Mindoro ug kasikbit nga mga prubinsya. Nalambigit usab ang Petron sa *oil spill* sa Cavite niadtong 2013 (500,000 litro); ug ang pinakagrabe nga *oil spill* sa Guimaras (2.1 milyong litro) niadtong 2006.

Delikado sa kahimsog sa tawo ang lana nga kasagaran motulo gikan sa mga barko. Naglangkub kini sa mga makadaot nga kemikal sama sa *mercury*, *arsenic* ug *lead*. Kini makahatag og pagpangamol sa panit, iritasyon sa pagginhawa ug kanser. Daku usab ang epekto niini sa kinaiyahan ug kinabuhi sa kadagatan ug baybay. Sa dugay nga panahon, apektado sa maong mga kemikal ang reproduksyon sa mga isda nga magpakita sa pagkunhod sa kuha sa mga mangingisda bisan wala na ang *oil spill*.

Kung mokaylap og ayo ang nayabong lana sa Manila Bay, maapektuhan ang panginabuhi sa dili moubos sa 29,000 ka mangingisda sa Cavite pa lang. Mahimo usab nga moabot sa ₱351 milyon ang kantidad sa kaudat sa panginabuhian sa 46,000 ka mangingisda sa Central Luzon, Region 4A ug National Capital Region. Gikabalak-ang madaut sa *oil spill* ang mga bakhawan, *seagrass*, *coral reefs* ug mga palaisdaan.

Pagtuon sa IKP ug AKP, gilunsad sa Southern Tagalog

DILI MOUBOS SA 21 ka indibidwal ang nakahuman sa sunud-sunod nga pagtuon sa Intermedya (IKP) ug Abanteng Kurso sa Partido (AKP) sa Southern Tagalog niadtong Mayo ug Hunyo, sumala sa report sa Kalatas, rebolusyonaryong mantalaan sa rehiyon, sa isyu niini niadtong Hunyo. Ang mga estudyanteng nakahuman naggikan sa mga sanga sa Partido sa hukbong bayan ug sentrong lungsod.

Kabahin kini sa gimbuhatong konsolidasyon human sa mga pagsumada sa mga komite sa Partido.

Napatuman ang pagtuon taliwala sa ginalunsad nga *focused military operations* sa mga pasistang tropa sa Armed Forces of the Philippines. Nahimong malampuson kini tungod sa determinasyon sa komite ug mga yunit, hugot nga koordinasyon ug maayong pagtuki ug mga lakang sa yunit kumand sa hukbong bayan, ug ang dili mahubas nga suporta sa baseng masa.

Gikan sa panid 4

pagawas-sulod sa barangay, ug ginapa-*logbook* ang bisan kinsa sa kahadlok nga “malusutan” sa BHB. Ginalimitahan nila ang pagpalit sa pagkaon, panggatong ug uban pang pangkonsumo sa pagtuo nga ihatag kini sa mga Pulang manggugubat. **AB**



Hunong-pasada sa UP-Diliman. Naghunong-pasada ang mga drayber ug opereytor sa dyip nga nagabyahe sulod sa UP-Diliman niadtong Agosto 1 aron supakon ang pagsulod sa kooperatiba sa *e-jeepney* nga moilog sa ruta sa mga tradisyunal nga dyip sa kampus. Gipangulohan ang protesta sa UP Transport Group, uban ang suporta sa mga estudyante, magtutudlo, ug mga trabahante ug empleyado sa unibersidad. Nagsumite usab ang grupo og sulat sa administrayon sa UP-Diliman. Naglakip kini sa unum ka hangyo sa mga drayber.

Pagsugat sa unang adlaw sa klase. Nagprotesta sa Mendiola sa Maynila ang mga magtutudlo nga myembro sa ACT-Philippines niadtong Hulyo 29, kadungan sa pag-abli sa klase. Gimakmak nila ang pagpasagad sa rehimen ni Marcos ug ang mga palpak niining mga palisiya sa edukasyon. Matud nila, napakyas ang rehimen ni Marcos sa pagtagad sa padayon nga kakulangan sa mga klasrum, magtutudlo, mga tauhang pangsuporta sa sektor sa edukasyon, kagamitan sa pagtudlo ug mga pasilidad.

Mga biktima sa bagyong Carina, nagpiket. Sunud-sunod nga piket-protesta ang gilunsad sa mga kabus sa kasuyudaran ug grupo nga maki-kinaiyahan niadtong Hulyo 29 sa upisina sa Department of Social Welfare and Development ug Department of Environment and Natural Resources sa Metro Manila. Gisingil nila ang rehimen ni Marcos ug ang mga ahensya niini sa ilang pagpasagad ug tulubagon sa mga naapektuhan sa bagyong Carina.

Jeepney phaseout, padayong gibatukan

PADAYONG GIBATUKAN SA mga drayber ug opereytor ang pagbasura sa Public Utility Vehicle Modernization Program (PUVMP) nga nagduso sa *jeepney phaseout* ug pag-ilis niini sa mahal ug karaang nga mga imported nga *mini-bus*. Kini human gideklara sa Department of Transportation (DOTr) nga magpadayon ang PUVMP bisan pa sa ikaduhang resolusyon sa senado aron ipasuspinde ang programa.

Gihatagan og pagtagad sa senado nga daghang mga dyip ang nagdumili sa pagkonsolida, tungod sa kakulang sa kapasidad sa mga drayber ug opereytor nga mopalit sa mahal kaayong mga *mini-bus*.

Masuspinde man o dili ang PUVMP, daku na ang kadaut nga gibung niini sa panginabuhian sa mga drayber ug opereytor. Gisulayan niining pugngan ang daghang mga dyip nga mamasada sa hulgang harangon ang mga dili konsolidadong dyip, kasohan ang mga drayber ug kuhaon (*impound*) ang mga dyip.

Kini taliwala sa wala gipublikong resolusyon sa LTFRB niadtong Abril 30 nga nagtugot sa mga dili konsolidadong dyip nga mamasada sa mga ruta nga wala o ubos ang konsolidadong prangkisa. Tinuyong gitago kini sa LTFRB sa mga drayber ug opereytor aron pugson ang daghan pang mga drayber nga wala nagpakonsolida nga mosulod sa PUVMP.

Pabug-at ang programa bisan sa mga nagkonsolida ug napugos nga mopalit sa mahal nga mga sakyanan nga daling madaut ug dili daling pangitaan og pyesa. Sa Iloilo City, nagresulta ang PUVMP sa pagkibhang sa daghang ruta sa gagmayng kooperatiba ug pagmonopolyo sa dagkung korporasyon sa mayor nga mga ruta sa sulod sa syudad.

Padayon ang panawagan sa Piston alang sa pagbalik sa 5-ka-tuig nga indibidwal nga prangkisa ug pag-atras sa mga napugos nga mga drayber sa ilang aplikasyon para sa konsolidasyon.

Pasistang lider sa Bangladesh, napalagpot sa mga protesta

NAPALAGPOT SA KATAWHANG Bangladesh ang *prime minister* sa nasud nga si Sheik Hasina Wazed niadtong Agosto 5 taliwala sa dagkung mga protesta batok sa iyang paghari. Napalayas siya usa ka adlaw human mahitabo ang labing maduguong protesta sa nasud, kung asa gipaulanan sa mga pulis og bala ang liboang raliyista. Kapin 90 ang diha-dihang namatay ug gatusan ang nasamdan niadtong adlaw.

Nagsugod ang mga protesta sulod sa mga unibersidad batok sa sistemang kota sa paghatag og mga trabaho sa burukrasya sibil. Paspas nga mikaylap ang pagbatok human balik-balik nga giatake sa mga pwersa ni Hasina ang mga demonstrasyon. Nagpatuman si Hasina og *curfew*, giputol ang internet, gipasarado ang mga unibersidad ug ang midya. Sa grabeng brutalidad sa mga pulis, miabot ang panawagan sa pagpanaug kay Hasina. Sa kinatibuk-an, kapin 300 ang namatay sa mga protesta nga unang miulbo niadtong Hunyo.

Anaa sa sentro sa mga protesta sa mga estudyante ug katawhang Bangladesh ang grabeng krisis sa ekonomiya, ug ang kakulang sa trabaho ug mga oportunidad sa nasud. Ang bugtong tarong nga trabaho sa nasud, labi na sa mga nakahaman sa kolehiyo, mao ang mga pwesto sa gubyerno. Tungod sa sistemang kota, nahimong limitado ang mga posisyon niini. Giusab na sa Korte Suprema ang maong sistema niadtong ikaduhang semana sa Hulyo.

Mga mamumuo sa Nexperia, magwelga

MIBOTAR ANG 1,246 sa kinatibuk-ang 1,883 nga mga mamumuo sa Nexperia Philippines Inc. Workers' Union (NPI-WU)-NAFLU-KMU pabor sa paglunsad og welga batok sa malukpanong pagpanangtang sa kumpanya. Gipahigayon sa unyon ang *strike vote* niadtong Hulyo 29-30 sa Cabuyao, Laguna.

Hapsay nga napatuman ang aktibidad human sa naunang natanggong nga botohan niadtong Hulyo 17-18 tungod sa dayag nga interbensyon sa maneydsment. Nagsumite ang unyon og Notice of Strike niadtong Hunyo 26.

Mamumuo sa senado. Niadtong Agosto 2, kadungan sa asembleya sa NPIWU-NAFLU-KMU, gianunsyo ni Jerome Adonis, pangkinatibuk-ang kalihim sa Kilusang Mayo Uno, ang iyang pagdagan sa pagkasenador ilalum sa Koalisyon Makabayan sa umalabot nga eleksiyong 2025. Si Adonis, 22 ka tuig nang organisador sa KMU, ang ikatulong kandidato ilalum sa Makabayan.

Eleksyon sa Venezuela, gihilabtan sa US

NAGMALAMPUSON ANG ELEKSYONG presidensyal sa Venezuela niadtong Hulyo 28. Subling nakadaog si presidente Nicolas Maduro, usa sa mga lig-ong anti-imperyalistang lider sa Latin America. Nakakuha siya og 51.2% sa mga boto, batok sa iyang kalaban nga si Edmundo Gonzalez Urrutia, nga nakakuha og 44.2%.

Gisulayan sa US ug mga alyado niini sa Latin America nga samukon ang eleksyon pinaagi sa *pag-hack sa data transmission system* nga nagresulta sa pagkalangan sa pagpagawas sa resulta sa ihap sa boto. Sa dihang wala kini nagmalampuson, gi-deklara nila nga "gilimbongan" ang eleksyon ug giila si Urrutia isip "midaog" bisan walay ebidensya sa pagpanikas.

Si Urrutia ang gipuling kandidato sa oposisyon nga si Maria Corina Machado, nga gibawalang modagan tungod sa iyang pagsuporta sa US sa pagpahamtang og mga ekonomikanhong sangsyon nga nagpaantus sa Venezuela, ug sa pagpanawagan alang sa langyawng interbensyong militar aron palagputon si Maduro.

Interbensyon sa US sa Asia, anaa na sa “hypermode”

Anaa na sa “hypermode” o mas taas nga yugto ang interbensyon sa imperyalistang US sa Asia niadtong Hulyo. Sugod Hulyo 25, unum ka mga nasud sa Asia ang gilipot sulod sa 10 ka adlaw ni State Sec. Antony Blinken (kalihim sa relasyong panggawas). Mibisita ug nakigpulong si Blinken sa Vietnam, Laos, Japan, Pilipinas, Singapore, ug Mongolia. Sumala sa pamahayag mismo sa US, ang tumong niini mao ang ipaabot sa mga “alyado” sa US nga ang komitment niini sa rehiyon nagpabiling “naputos sa puthaw” sa katapusang unum ka bulan sa administrasyon ni Pres. Joseph Biden. Nakatakda nang monaog si Biden human ang eleksyon sa US sa Nobyembre.

Sa Japan ug Pilipinas, kauban ni Blinken si Defense Sec. Lloyd Austin sa gitawag og 2+2 nga tigum sa ilang mga kaatbang nga ministro.

Sa Japan, giduso sa US ang pagdugang sa badyet pangmilitar niini sa “makasaysayanong ang-ang” aron pataason ang kapasidad militar niini batok sa komun nilang kaaway nga China. Lakip dinhi ang pagpalambo sa Japan sa mga armas nukleyar ilalum sa “nuclear deterrence” (pagpugong sa posibilidad sa gubat nukleyar). Gipalig-on usab sa US ang gitawag nga US Forces Japan sa Tokyo, nga mao ang sentro sa kumand sa militar sa US nga nagdumala sa dili moubos sa 120 ka aktibong base militar sa nasud. Kapin 55,000 ka tropang Amerikano ang permanente nga nakabase sa Japan.

Nakaabot si Blinken sa Pilipinas niadtong Hulyo 29 para sa mga tigum diplomatiko ug pangseguridad. Kini na ang iyang ikatulo nga pagbisita sa nasud sa miaging duha ka tuig. Niadtong Hulyo 30, sa unang higayon, gihimo sa Pilipinas ang 2+2 nga pulong, nga kaunay ginahimo sa US sukad niadtong 2012. Gipatawag nila Blinken ug Austin si Enrique Manalo, kalihim sa Department of Foreign Affairs, ug Gilberto Teodoro, kalihim sa Department of National Defense sa Pilipinas. Sa wala pa kini, gimiting sa duha ka upisyal sa US si Ferdinand

Marcos sa Malacañang niadtong Hulyo 29.

Gihisgutan sa maong pulong ang plano alang sa paghimo sa General Security of Military Information Agreement. Unod sa maong kasabutan ang kuno “pag-inambitay” og sensitibong mga impormasyong militar sa duha ka nasud. Posibleng lain na usab kini ka dili patas nga kasabutang militar tali sa US ug Pilipinas, nga maglangkub lamang sa “sensitibong impormasyon” gikan sa Pilipinas. Himuon lamang niining pormal ang dugay nang interbensyon sa US sa mga internal nga isyu nga may kalabutan sa nasudnong seguridad sa Pilipinas.

Diri usab gianunsyo ni Austin ang paghatag sa US og \$500 milyong ayudang militar (o *foreign military financing*) sa

Pilipinas. Ang maong kantidad 12 ka beses nga mas daku kumpara sa \$40 milyong kasagaran nga tinuig nga ayudang militar sa US sa Pilipinas. Gamiton kini sa “pagpalit” sa mga karaang armas ug mga sakyanang iggugubat, nga gustong ihanok sa US sa nasud sa takuban sa “modernisasyon” sa AFP. Tumong niining dugang pang ihikot ang Pilipinas sa heyopolitikal nga estratehiya sa US ug gamiton ang nasud isip lunsaran sa giandam nga gubat sa rehiyon. Gawas niini, gianunsyo usab ni Austin nga maggahin kini og \$128 milyon alang sa konstruksyon sa dili moubos sa siyam ka base militar ilalum sa EDCA nga para sa eksklusibong gamit sa mga tropang Amerikano.

Gisugat sa mga protesta ang subling pagbisita ni Blinken ug Austin sa Pilipinas. Nagrali sa Camp Aguinaldo ang lain-laing mga grupong nasudnong-demokratiko niadtong Hulyo 30 aron makmakon ang rehimeng Marcos sa pagpasulod sa duha ka kriminal sa gubat sa nasud. Matud nila, responsable ang duha sa pagpanulsol og gyera sa lain-laing bahin sa kalibutan, ug sa pagduso sa henosidyo sa Palestine.

Gimakmak usab nila si Marcos sa iyang pagpanglimos ug pagyukbo sa duha ka imperyalistang ahente, pagtugot sa presensya sa mga langyawng tropa ug pagtahan sa soberanya sa nasud sa nagkadaghang “EDCA site” ug mga *war games* nga nagdala og kadaut sa panginabuhi sa mga tawo. Niadtong Hulyo 31, naglunsab usab og raling pinakilab ang kabatan-onan atubangan sa embahada sa US.

Sa Japan, susamang protesta usab ang gilunsad niadtong Hulyo 28 kadungan sa US-Japan 2+2 *ministerial meet* sa Tokyo. Panawagan sa mga aktibista sa Japan ug Pilipinas, “Blinken ug Austin, dili *welcome!*”



4 ka tawo, gipatay sa AFP

Tulo ka *hors de combat* ug usa ka tigulang nga mag-uuma nga walay ika-sukol ang gipatay sa militar sa miaging mga semana. Walo usab ang giaresto ug gipasakahan og mga hinimo-himong kasong kriminal.

Sa Negros Occidental, gidagit sa 15th IB ang 69-anyos nga mag-uumang si Ramon Enseñales, gidala sa kakahuyan, ug tinuyong gipatay niadtong Hulyo 29 sa Sityo Pasto, Barangay Basak, Cauayan.

Duha ka *hors de combat* nga manggugubat sa Bagong Hukbong Bayan (BHB)-Southwest Negros ang gipatay usab sa 15th IB sa Barangay Camindangan, Sipalay City sa maong prubinsya. Niadtong Hulyo 29, gidakop sa 15th IB ang 23-anyos nga Pulang mandirigma nga si Reggie Fundador (Ka Tata) sa Sityo Badyang. Sa sunod adlaw, nakita na lamang ang iyang patayng lawas sa dalan sa Crossing Magtanday, Barangay Camindangan. Makita sa iyang patayng lawas ang mga timaan sa tortyur. Niadtong Agosto 1, gipatay sa 15th IB ang *hors de combat* nga si Alvin Lumagsao Sinsano (Ka Zian) sa Sityo Cambugiot sa parehas nga barangay.

Sa Rizal, tinuyong gipatay human madakpan sa 80th IB si Wally Agudes (Ka KM) niadtong Hulyo 18

sa Barangay Burgos, Rodriguez. Si Ka KM adunay grabeng trangkaso nga hinungdan sa iyang pagpabilin sa komunidad.

Pag-aresto. Iligal nga gikuha ug gitortyur sa mga pwersa sa estado ang upat ka mga organisador sa mga mag-uuma nga silang Maria Theresa Buscayno, Desiree Jaranilla Patuñ-og, Andres Ely, ug Oliver Millo niadtong Hulyo 29 sa gabii. Gidagit sila samtang nagbyahe sa Jose Abad Santos Avenue sa Mexico, Pampanga.

Gipasakaan sila og mga kasong *illegal possession of firearms and explosives*. Gipagawas nga nakumpiska kanila ang lain-laing mga armas ug granada. Nakapriso sila karon sa San Fernando, Pampanga.

Niadtong Hulyo 11, giaresto sa 203rd IBde ang lider sa Sityo Lukban, Barangay Panaytayan, Mansalay sa Oriental Mindoro nga si G. Itaw Ramunyan. Gilambigit siya sa nahitabong engkwentro sa usa ka yunit sa 203rd IBde ug BHB sa maong sityo sa buntag niadtong adlaw.

Pipila ka adlaw human niini, giaresto ug gipriso sa mga sundalo ang duha ka Mangyan-Hanunuo uban ang duha nilang pasahero samtang nagbyahe sa Sityo Tambangan, San Roque, Bulalacao.

Sa Rizal, giaresto usab niadtong Hulyo si Laila Ramos, usa ka organisador sa katutubong Dumagat-Remontado.

Demolisyon. Bangis nga gidemolis sa mga ginsakpan sa kumpanyang Megaland Prime Estate Corporation ang gitawag nga Donald Compound sa FB Harrison St sa Pasay City niadtong Agosto 1. Giguba sa *demolition team* ang 40 ka mga balay kung asa nagpuyo ang 500 ka residente.

Gidagit sa mga pulis niadtong Agosto 3 ang aktibistang si Benedict Macabenta nga anaa sa lugar aron mosuporta sa mga residente. Gitapakan siya sa mga pulis ug gisumbag sa nawong.

Sa Quezon City, dili moubos sa tulo ka kababayan-ang residente sa King Christian St, Barangay Bagbag, Novaliches ang nasamdan niadtong Hulyo 28 sa ilang pagkontra sa iligal nga pagkoral ug demolisyon sa ilang komunidad. Adunay 30 ka mga trabahante ug maton ni Roberto Collantes, nga nangilog og yuta, ang gimandoan nga bungkagon ang mga balay sa lugar.

Pagpamig-ot. Gipasakahan og kasong pagpatay ug giakusahang myembro sa BHB ang tulo ka kagawad sa midya ug usa ka upisyal sa impormasyon sa lokal nga guberno sa Masbate niadtong Hulyo. Gihimo kini human nilang magpasaka og 11 ka kaso batok kang Gov. Antonio Kho sa Masbate ug sa iyang mga alipures niadtong Marso 25 bahin sa korapsyon sa mga lokal nga proyekto sa prubinsya.

Sa Quezon City, gitiunan og pusil ug gihulga ang organisador sa mga mamumuo nga si Grace Villota sa University of the Philippines-Diliman niadtong gabii sa Hulyo 22. **AB**

"Libreng wifi" sa NCIP sa Rizal, para sa sarbeylans

NABALAKA ANG MGA residente sa Barangay San Rafael, Rodriguez, Rizal sa gimontar sa National Commission on Indigenous Peoples (NCIP) nga "libreng wifi" sa ilang barangay niadtong Mayo. Sayod silang gibutang kini aron subaybayan sila sa National Task Force-Elcac.

Matud sa taho, mismo ang NCIP ang nagbutyag sa tumong sa "libreng serbisyo." Sa usa ka pulong niadtong Mayo 24, gimandoan sa mga ginsakpan niini ang mga residente nga gamiton ang libreng wifi aron "mkontak sa NTF-Elcac ug magtaho sa mga bali-balita aron ipabilin ang kalinaw sa barangay."

Aron makagamit, kinahanglan pang ihatag sa mogamit ang iyang pangalan, edad, ug kasarian. Nagpasabot kini nga pagatigumon sa NCIP ug NTF-Elcac ang personal nga impormasyon sa mga mogamit sa serbisyo. Gitukod ang "libreng serbisyo" sa pakigtambayayong sa United Nations Development Programme ug Broadband ng Masa.

30%

lamang ang nahuman sa "master plan" kontra-baha sa NCR sa milabayng dekada. Wala pay subling nasugdan dinhi sa 2 ka tuig ni Marcos sa gahum.



1,002

eskwelahan ang wala nagklase niadtong Hulyo 29, tungod sa kadaut sa bagyong Carina ug hanging habagat.

Resulta kini sa pagkainutil ug kakulang sa pagpangandam sa DepEd ug rehimeng Marcos.



₱848 BILYON

ang awtomatikong gigahin alang sa pagbayad sa interes sa nasudnong utang sa 2025 sugyot nga badyet, 25.6% mas taas kumpara sa milabayng tuig.

₱89.9 BILYON

ang "wala nagasto" nga pondo sa Philhealth ang "gibalik" sa nasudnong kaban, taliwala sa daghan kaayong pasyente ang wala nakatagamtam sa maong benepisyo.

461.4 milimetro

ulan ang mibundak niadtong Hulyo 25 sa paghampak sa Bagyong Carina ug habagat, kapin sa 455 milimetrong ulan sa Bagyong Ondoy niadtong 2009.



\$152 trilyon

ang kantidad sa rekursong gihuthot sa adunahang nasud sa mga nasud nga atrasado ug semikolonyal gikan 1960 hangtud 2018. Lakip dinhi ang binilyong toneladang hilaw nga materyales ug binilyong oras sa baratong kusog-pamuo sa maong mga nasud.

Gikan sa: Plunder in the Post-Colonial Era: Quantifying Drain from the Global South Through Unequal Exchange, 1960-2018

359

kaso sa ekstrahudisyal nga pagpamatay nga may kalambigitan sa iligal nga droga ang nataho sa ikaduhang tuig ni Marcos sa poder, sukwahi sa pamahayag niyang "bloodless" (dili maduguon) ang iyang "gyera kontra-droga."

Gikan sa: DahasPh

48%

sa mga kasal nga Pilipina ang nakasinati og pisikal nga pagpangabuso gikan sa ilang asawa.

Perwisyo ug pagbaha ang dala sa mga proyektong dam sa Kalinga

Sa pagsulod sa panahon sa tag-ulan, hilabihang nabalaka ang katawhan sa Northern ug Central Luzon sa perwisyo ug pagbaha nga ibunga sa mga dam nga planong tukuron sa rehimeng Marcos sa Cordillera. Kapin 100 ka negosyong *hydropower dam* ang nakatakdang tukuron sa rehiyon. Dili moubos sa 20 ang pagatukuron sa mayor nga mga suba sa Kalinga.

Nagsilbing tinubdan sa maiinum nga tubig ug irigasyon ang mga sapa ug suba sa Kalinga. Mayor nga produkto dinhi ang humay, mais, kape, saging ug lain-laing klase sa *beans*.

Ang Chico River ang nag-unang suba sa prubinsya gikan sa Mountain Province. May gitag-on kining 175 ka kilometro ayha mokunekta sa Cagayan River. Imbes nga ampingan ang maong katubigan, ug palambuan alang sa pagpataas sa produksyon ug panginahanglan sa katawhan, gibaligya kini sa rehimeng Marcos sa mga langyaw ug lokal nga kapitalista. Ilalum sa pagpalambo sa "renewable energy," ginaduso sa rehimeng Marcos ang mga *hydropower dam* isip tinubdan sa kuryente.

Gikonsidera ang Cordillera nga adunay pinakadakung potensyal para sa *hydropower*. Naglaway si Marcos ug ang iyang mga alipures ang pondong ibubo sa mga imperyalistang nasud sa pagtukod og mga dam sa ngalan sa "pag-atubang sa krisis sa klima." Gihatag niya ang daghang mga pribilehiyo sa mga kumpanya, lakip na ang paglibre sa pagbabayad og buhis ug uban pang insentibo.

Lakip usab sa pag-engganyo sa mga langyaw ang pagpadali ug pagpasayon sa pag-apruba sa ilang aplikasyon. Gigamit ang mga ahensya sa guberno aron ilaron, bahin-bahinon, ug pugson ang mga grupo sa nasudnong minoritya nga suportahan ang maong mga proyekto. Gideploy usab ang AFP aron magbantay sa mga proyekto ug sumpuon ang pag-supak sa katawhan.

Ang pinakadaku sa mga proyektong mao ang Chico River Hydropower Project nga giingong adunay kinati-

buk-ang kapasidad nga 150 megawatts. Gipasiugdahan kini sa San Lorenzo Ruiz Piat Energy ug Water, Inc.

Malukpanong kadaut

Walay laing epekto sa mga lumad sa Kalinga ug Cordillera, ug katawhan sa mga kasikbit nga rehiyon, ang maong mga proyekto kundili malukpanong kadaut. Daghang mga kahoy ang putlon para sa konstruksyon sa mga dam, mahugaw ug maguba ang kayutaan. Angkunon sa mga kumpanya ang mga mineral nga makuha sa yuta.

Adunay mga komunidad nga mabahaan, samtang adunay mawad-an og tubig. Ang mga komunidad sa ubos sa dam makasinati og kalit nga mga pagbaha. Ingon niini ang kasinatian sa Cagayan Valley sa dihang mihampak ang bagyong Ulysses niadtong Nobyembre 2020. Nalubog sa baha ang 60 ka lungsod ug syudad human kinahanglang ablihan ang Magat Dam tungod sa pagsaka sa mga sapa. Kapin 300,000 ka mga tawo ang naapektuhan.

Samtang, ang mga komunidad sa ilalum o unahan sa dam makasinati og *siltation* o pagbabaw sa sapa, nga resulta sa pagtapun-og sa lapok ug pag-usab sa daloy sa tubig.

Bisan unsa pa ang disenyo sa dam, makibhangan ang tubig nga libreng ginapahimuslan sa katawhan alang sa irigasyon ug gamit pangbala. Bisan pa man og isulti sa mga kumpanya nga "mga gamay nga dam" ang itukod, kung serye o magkasunod sa usa ka sapa, pareho ra gihapon sa dagkung dam ang epekto niini sumala sa Cordillera People's



Democratic Front (CPDF)-Kalinga.

Maaapektuhan usab sa daloy ug gilalumon sa tubig ang mga hayop ug tanum nga nabuhi sa katubigan. Mahimo silang maanod tungod kay milalum ang tubig sa dam o nahimong mas kusog ang daloy sa tubig paingon sa *tunnel*. Mamatay usab ang mga hayop ug tanum sa ibabaw kung mabaw ang tubig ug magkadaghan ang lapok.

Atubangan niini, hagit sa CPDF-Kalinga ang pagtukod sa pinakalapad nga panaghiusa sa katawhan sa Cordillera aron hiniusang panalipdan ang ilang yuta ug rekurso. Kinahanglang gamiton ang mga porma sa panaghiusa sama sa mga progresibo ug rebolusyonaryong *bodong*, pagtukod og rebolusyonaryong guberno sa katawhan sa Cordillera (CPRAG o Cordillera People's Revolutionary Autonomous Government) ug mga balangay sa CPDF.

Panawagan usab nila nga makighiusa sa katawhan sa uban pang mga rehiyon sa Pilipinas ug sa uban pang mga nasud nga mibarog batok sa pagpangilog sa mga negosyong kapitalista sa ilang yuta ug rekurso.

Gikan sa praymer sa CPDF-Kalinga, Mayo 2024.